

18 OCT 2001

DR MAHATHIR TINJAU PERSIAPAN TERAKHIR PEMBENTANGAN BELANJAWAN

KUALA LUMPUR, 18 Okt (Bernama) -- Perdana Menteri Datuk Seri Dr Mahathir Mohamad hari ini meninjau persiapan terakhir oleh kakitangan Kementerian Kewangan sebelum pembentangan Belanjawan 2002 di Parlimen petang esok.

Dr Mahathir melawat Bahagian Jawatankuasa Penyediaan Ucapan dan Bahagian Percetakan, Kementerian sambil diiringi oleh kedua-dua Timbalan Menteri Kewangan, Datuk Dr Shafie Salleh dan Datuk Chan Kong Choy.

Turut serta dalam lawatan itu ialah isteri Perdana Menteri Datin Seri Dr Siti Hasmah Mohamad Ali, Setiausaha Parlimen Kementerian Kewangan Hashim Ismail dan Ketua Setiausaha Kementerian Tan Sri Dr Samsuddin Hitam.

Perdana Menteri tiba di Kementerian tepat pada pukul 9 malam dan menghabiskan masa kira-kira satu jam setengah meninjau persiapan pembentangan belanjawan itu sebelum menikmati jamuan malam.

Menurut seorang kakitangan Kementerian, sejumlah 1,700 naskah belanjawan itu telah dicetak untuk diedarkan esok.

Esok, Dr Mahathir akan menunaikan solat Jumaat terlebih dahulu di Masjid Putrajaya sebelum membentangkan belanjawan 2002 di Parlimen pada pukul 4 petang.

-- BERNAMA

MHI MFZ PR